

## UMP anjur program Jom Membaca di Rumah Permata Camar

UM (Helo Kanyus) Khamis 26/10/10 ms26

KUANTAN 19 Okt. – Seramai 39 anak yatim Rumah Permata Camar (RPC), Sungai Soi di sini menyertai program Jom Membaca anjuran Pusat Bahasa Moden dan Sains Kemanusiaan (PBMSK) Universiti Malaysia Pahang (UMP) yang diadakan di rumah anak yatim tersebut baru-baru ini.

Pada program tersebut, anak-anak yatim turut diberi ceramah motivasi oleh pensyarah PBMSK, Mansor Sulaiman mengenai penguasaan masa dan merangsang usaha mencapai kecemerlangan dalam akademik.

Seramai 30 kakitangan UMP terlibat dalam menjayakan program itu dalam usaha menyuntik dan membimbing anak-anak yatim di rumah kebajikan itu supaya mereka lebih berkeyakinan dalam penguasaan bahasa Inggeris.

Pada program itu juga, UMP menyumbangkan barangan keperluan harian dan lam-

pin pakai buang kepada seorang penghuni, Ahmad Nur Tarmizi Mustafa, 20, yang mempunyai masalah pendengaran dan penglihatan.

Dekan PBMSK, Prof. Dr. Abd Jalil Borham berkata, program itu merupakan inisiatif untuk memberi khidmat sukarela dalam konteks pendidikan dan meraikan anak yatim tanpa mengira kaum, keturunan dan agama.

Menurutnya, UMP juga memberi penunjan kepada pelajar-pelajar di RPC bagi meningkatkan lagi penguasaan pembacaan dan penulisan dalam bahasa Inggeris.

“Ini adalah sebahagian tanggungjawab sosial dan amanah kami dalam membantu anak-anak yatim menjadi insan yang cemerlang,” katanya.

Pengarah program tersebut, Prof. Madya Ainol Haryati Ibrahim berkata, program ini adalah sebagai usaha meningkatkan motivasi

dan menyuntik semangat anak-anak yatim tersebut supaya mereka lebih berkeyakinan dalam penguasaan bahasa Inggeris.

“Mereka berpotensi dan mempunyai masa depan cerah untuk berjaya ke peringkat yang lebih tinggi jika diasuh dan diberikan didikan yang sempurna,” katanya.

Menurut Ainol Haryati, pihaknya menyediakan sebuah bilik bacaan yang berfungsi sebagai sebuah pusat sumber yang mengandungi bahan-bahan bacaan bahasa Melayu dan bahasa Inggeris.

Sementara itu, Pengerusi RPC, Badrul Huzaini Mohd. Yusof berkata, golongan anak yatim perlu diberikan latihan terutama dalam bidang akademik supaya mereka dapat mencapai keputusan cemerlang dalam peperiksaan yang bakal diduduki.

Menurut beliau, pendedahan daripada aktiviti yang telah dilaksanakan itu ternyata

menunjukkan hasil apabila ada kalangan anak yatim mampu mencatat keputusan cemerlang.

“Matlamat RPC adalah mengumpulkan anak-anak yatim yang miskin dan terbiar serta tiada tempat pergantungan dengan memberikan kemudahan tempat tinggal dan pendidikan terbaik dari segi akademik mahupun kerohanian,” katanya.

Seorang penghuni rumah tersebut, Mohd. Zulhelmi Mohd. Asif, 15, berkata, program sedemikian dapat memberi kesan positif dan seterusnya merangsang usaha untuk berjaya dalam Penilaian Menengah Rendah (PMR) yang bakal didudukinya nanti.

“Jika program ini dijadikan amalan dan budaya kehidupan, sudah tentu golongan anak yatim tidak akan rasa tersisih malah mereka berasa dihargai masyarakat,” katanya.